

Prome Minister Eman “Mi ta haya e iniciativa di KLM uno fantastico”

KLM, un otro partner mas di Aruba 2020

Den e compania di aviacion KLM, Aruba a haya un partner mas pa logra su vision pa na 2020 ta un isla 100% sostenibel. Un isla cu ta draai riba energia berde. E biento duro y constante, solo cayente y fuerte y e awa cristalino di lama ta elementonan cu e isla aki tin na abundancia. Tur ta wordo uza caba pa asina logra e reto cu gobierno di Aruba a pone su dilanti. Aruba 2020 ta un pasion grandi di Prome Minister Mike Eman. Un pasion cu semper bay el a vocifera cu ardor y haya atencion p’e. Aruba ta hayando ayudo y sosten di varios aliado. TNO, Carbon War Room di Sir Richard Branson y Universidad di Harvard ta algun di e partnernan di Aruba 2020. KLM tambe ta un partner mas di e agenda berde di e isla aki



cu ta wordo guia pa e campaña ‘Green Aruba – Our road to 2020’.

KLM ta un lider den sostenibilidad riba tereno di aviacion. E avionnan di KLM ta wordo pinta cu verf cu no ta dañino pa medio ambiente y e compania

ta sigui en busca di otro fuentenan pa sigui cu su desafio pa ta un compania mas sostenibel posibel. Ta pesey cu e compania di aviacion a lansa un competencia mundial, e ‘KLM Green Challenge’ cu tin como meta pa bin cu ideanan innovativo

con desaroya mas tanto energia berde posibel pa e isla aki. Un desaroyo sumamente positivo. Prome Minister Mike Eman den un mensahe via video ta invita hende cu mentenan creativo riba un plan mundial pa participa na e ‘KLM Green Challenge’ di KLM y manda nan ideanan aden cu ta aplicabel pa haci Aruba mas duradero ainda. Prome Minister Eman “Mi ta haya e iniciativa aki di KLM uno fantastico y di gran importancia pa Aruba. Un tremendo proyecto. Mi ta masha contento y na mes momento orguyoso cu KLM ta pone Aruba di e forma aki den un spotlight mundial”. Hopi reaccionnan positivo ta drelando caba riba e yamada di Prome Minister Eman y e propaganda cu KLM mes ta haciendo cu su Green Challenge.

E ultimo dia pa manda ideanan aden ta dia 28 di april. Asina ta, haci lihe pasobra ta un par di dia so tin mas. Riba 9 di mei e dies miho ideanan ta wordo presenta na e oficina principal di KLM. Di nan 5 ta wordo scogi pa dia 17 di mei e participanenan bin Aruba unda nan ta wordo evalua pa un hurado consistiendo di Prome Minister Eman, KLM CEO Camiel Eurlings y J. van den Gronden di Wereld Natuur Fonds (WNF). Pa mas informacion por subi riba e website <http://greenaruba.klm.com>.

Riba e potret por mira Prome Minister Eman hunto cu KLM CEO Camiel Eurlings
Potret: Nico van der Ven